

XV. IGANDEA URTEAN ZEHAR (B)

Otoitza

Zure egiak, Jauna, argitu egiten ditu oker dabiltzanak,
bide zuzenera itzul daitezten;
egizu, izenez kristau direnek
egintzetan bete dezatela eta agertu
beren kristau izatea.
Zure Seme Jesu Kristo.

I. IRAKURGAIA: Am 7, 12-15

Zoaz, eta hotsegin iezaiozu profeta-hitza nire herriari.

Amos Profetaren liburutik

Egun haietan, Amasiasek, Betelgo apaizak, honela esan zion Amosi: «Ikusle, zoaz hemendik; ihes egizu Judako lurraldera; jan ezazu han zure ogia, eta hotsegin han profeta-hitza. Baina Betelen ez hotsegin gehiago profeta-hitzik; hau erregeren toki santua da eta, erreinuko jauretxea». Amosek erantzun zion Amasiari: «Ni ez naiz profeta; ezta profetaren semea ere; artzaina naiz ni, basapiku inauslea. Artaldearen atzetik nenbilela hartu ninduen Jaunak; eta esan zidan: "Zoaz, eta hotsegin iezaiozu profeta-hitza Israel nire herriari"».

ERANTZUN SALMOA: Sal 84, 9ab-10. 11-12. 13-14

R/. **Jauna, zure onginahia erakuts iezaguzu,
zeure salbamena emaguzu.**

Entzungo dut Jaunak dioen hitza:
«Bakezkoa da Jainkoaren hitza.»
Hurbil zaie Haren beldur direnei salbamena:
gure lurrean Haren aintza biziko da. R/.

Onginahia eta leialtasuna elkarren bidera aterako dira,
zuzentasuna eta bakea laztanka biziko dira.
Lurretik erneko da leialtasuna,
zerutik begira egongo, zuzentasuna. R/.

Jainkoak on dena emango du,
gure lurra bere uzta ekarriko du.
Zuzentasuna ibiliko da Haren aurrean,
eta salbamena, Haren urratsen bidean. R/.

II. IRAKURGAIA: Ef 1, 3-14

Irakurgai laburragoa egin nahi bada, [] kako artean ematen den zatia utz daiteke.

Kristorengan au'

San Paulo Apostoluak Efesotarrei

Bedeinkatua izan bedi Jainkoa,
 Jesu Kristo gure Jaunaren Aita,
 Espirituaren era guztietako bedeinkapenez,
 zeruan Kristorengan bedeinkatu gaituena.
 Harengan aukeratu baikintuen,
 mundua sortu baino lehen,
 Haren aurrean, maitasunez,
 santu eta errugabe izan gaitezen.
 Aurrez aukeratu gintuen semeordeko izateko,
 Jesu Kristoren bidez,
 bere nahiaren aberastasunez;
 bere Seme maitearengan
 hain ugari eman digun graziaren aintzak
 Bera gorespenez bete dezan.
 Seme honengan, Honen odolaz dugu erospena,
 eta bekatuen barkamena;
 halakoa izan da Haren grazi aberastasuna.
 Oparo isuri baitigu bere grazia
 ezaguera osoz eta jakinduriaz:
 bere nahiaren misterioa ezagutarazi digu,
 bere onginahiz erabakita zeukana,
 garaia zetorkenean beteko zuena:
 Zeruko eta lurreko gauza guztiak
 Kristorengan bilduko dituela,
 Berau buru dela.

[Kristorengan oinordeko gertatu gara gu ere; horretara deituak izan gara, gauza guztiak Berak nahi bezala egiten dituenaren erabakiz. Eta Kristorengan uste on izan genuenok, Jainkoaren aintzaren gorespen izango gara.

Baita zuek ere –egiaren mezua entzun duzuenok, zuen salbamenaren berri zoragarria, alegia– hori sinestean, agindutako Espiritu Santuaz seinatuak izan zarete. Eta Espiritu Santuan dugu gure oinordekotasunaren baikuntza, Jainkoaren aintzaren gorespenarako, bere herrian denek salbamen bete iritsi bitartean.]

EBANJELIOA: Mk 6, 7-13

Aleluia: Ik. Ef 1, 17-18

R/. Aleluia.

V/. Jesu Kristo gure Jaunaren Aitak
 argi bitza gure bihotzeko begiak,
 horrela jakin dezagun
 nolakoa den Haren deiaren itxaropena. R/.

Bidaltzen hasi zen.

Jesu Kristoren Ebanjelioa San Markosen liburutik

Aldi hartan, Jesusek Hamabiei dei egin zien; binaka bidaltzen hasi zen, eta espiritu lohien gain ahalmena eman zien.

Eta biderako ezer ez hartzeko agindu zien, makila bat besterik; ez ogirik, ez bidezorrorik, ez dirurik gerrikoan; oinetakoak, bai, eramateko; baina ez hartzeko bi soineko.

Eta esan zien: «Sartzen zareten etxean egon zaitezte, leku hartatik atera arte. Eta herriren baten hartzen ez bazaituzte eta entzuten ez badizue, astindu zeuen oinetakoen hautsak handik aldegitan, haien kontrako testigantzarako.

Joan ziren haiek, eta bihotz-berri zitezela hotsegiten zuten; deabru asko uxatzen zuten eta gaixo asko olio gantzutu eta sendatzen zuten.

Oparigaien gainekoa

Begira, Jauna, otoitzean dagoen Elizaren eskaintzari,
eta iguzu, opari hau hartuko dugunok
santuagoak izan gaitezela.
Jesu Kristo.

Jaunartze ondorengoa

Zure dohainak harturik, otoitz egiten dizugu, Jauna:
misterio hau ospatzen dugun bakoitzean
gehitu dadila gure salbamena.
Jesu Kristo.